



Čistoća srca i jezika muslimana, i iskorištavanje vremena (Medina)

Hatib: dr. Ahmed ibn Talib ibn Abdulhamid

17. šaban 1444. po Hidžri / 10. mart 2023.

Hvala i zahvala pripadaju Allahu, Njega hvalimo, od Njega pomoć i oprost tražimo, i Njemu se utječemo od zla naših duša i naših loših djela. Koga Allah uputi, niko ga ne može u zabludu odvesti, a koga On u zabludi ostavi, niko ga ne može uputiti. Svjedočim da nema boga osim Allaha, jedinog, Koji nema druga, i svjedočim da je naš prvak i vjerovjesnik Muhammed, sallallahu alejhi ve sellem, Njegov rob i Poslanik, neka su na njega Allahova milost, spas i blagoslov, i na njegovu porodicu i ashabe.

Uzvišeni kaže: "O vi koji vjerujete, bojte se Allaha istinskom bogobojažnošću i nipošto ne umirite osim kao muslimani!" (Ali Imran, 102)

"O ljudi, bojte se Gospodara svoga, Koji vas je stvorio od jedne osobe, od koje je njen par stvorio, a od njih dvoje mnoge muškarce i žene rasijao. Bojte se Allaha, Čijim imenom jedni druge molite, i čuvajte rodbinske veze. Allah vas, doista, nadzire." (En-Nisa, 1)

Najistinitiji govor je Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari su novouvedene stvari u vjeru, svaka novouvedena stvar u vjeru je novotarija, svaka novotarija je zabluda, a svaka zabluda vodi u Vatru.

O vjernici, predvodnik sljedbenika čiste vjere, Ibrahim, alejhis-selam, molio je svoga Gospodara blagoslovljenim i lijepim riječima: "Gospodaru moj, podari mi znanje i uvrsti me među one koji su dobri i učini da me po lijepom spominju oni što će poslije mene doći, i učini me jednim od onih kojima ćeš džennetske blagodati darovati – i ocu mome oprosti, on je jedan od zalutalih." (Eš-Šuara, 83–86) Časni poslanik Ibrahim znao je da se kod Allaha neće spasiti osim onaj ko svoje srce očisti od





zabranjenih strasti i sumnji u vjerovanju, radi Allaha, Gospodara svih svjetova, pa je rekao: "... i ne osramoti me na Dan kad će ljudi oživljeni biti, na Dan kada neće nikakvo blago, a ni sinovi od koristi biti, samo će onaj koji Allahu srca čista dođe spašen biti" (Eš-Šuara, 87–89).

Naš Poslanik, sallallahu alejhi ve sellem, rekao je: "Allah ima Svoje posude na Zemlji, a posude vašeg Gospodara su srca Njegovih dobrih robova. Najdraža su mu ona najnježnija i najblaža srca."

O vjernici, srca čestitih ljudi žude za djelima dobročinstva, a srca pokvarenih ljudi žude za nevaljalštinama. Allah vidi težnje i želje svakoga od vas, zato dobro pogledajte šta su vaše težnje. Čovjekova djela proizlaze iz njegovih težnji i želja. Allah će prihvatiti samo onu posudu koja je u isto vrijeme čvrsta, nježna i čista: čvrsta u pokornosti Allahu, nježna kada se Allah spomene i čista od onoga što Allah prezire i ne dopušta. Jezici su grabilice srca i oni grabe ono što je u srcima, a znak njihove čistoće i zdravlja je ustrajnost u spominjanju Allaha, bez osjećaja dosade i zasićenja. Uzvišeni Allah kaže: "U stvaranju nebesa i Zemlje i u izmjeni noći i dana su, zaista, znamenja za razumom obdarene, za one koje i stojeći i sjedeći i ležeći Allaha spominju i o stvaranju nebesa i Zemlje razmišljaju. 'Gospodaru naš, Ti nisi ovo uzalud stvorio; hvaljen Ti budi i sačuvaj nas patnje u Vatri!'" (Ali Imran, 190–191) U spominjanje Uzvišenog Allaha spada stjecanje korisnog znanja, podučavanje drugih i ispravno razumijevanje Allahove vjere, kao što kaže Allahov Poslanik, sallallahu alejhi ve sellem: "Kada budete prolazili pored džennetskih bašči, svratite u njih i uzmite njihove plodove." "A šta su to džennetske bašče?", upitaše ashabi. "To su halke na kojima se spominje Allah." To su halke znanja na kojima se uče propisi halala i harama, i na kojima se govori o Allahu, Njegovim imenima, svojstvima, naredbama i zabranama, i o Poslaniku, sallallahu alejhi ve sellem, njegovim imenima, vrlinama, sunnetu, životu, mudžizama, dokazima njegovog poslanstva i posebnostima. Onaj čije je srce čisto i živo, osjeća bol zbog svakog propuštenog dobrovoljnog namaza, učenja Kur'ana i zikra, i ta bol je veća od boli za gubitkom bilo kojeg materijalnog dobra. Koga je Allah opskrbio duhovnom budnošću, taj će





sigurno sebično čuvati svaki svoj trenutak, propitivat će svoju dušu, kao kakvog dužnika, za svaki udisaj i izdisaj, ustrajno će raditi na popravljajući svojih riječi i djela i suprotstaviti će se njenim prohtjevima, radi Allaha. Ko se cijelim srcem okrene Allahu, i sve svoje brige i težnje usmjeri Njemu, On će mu biti dovoljan u odnosu na sve ostalo. Allahov Poslanik, sallallahu alejhi ve sellem, rekao je: "Čija najveća briga bude ahiret, Allah će mu dati bogatstvo u srcu, podariti će mu pribranost u svim situacijama, i dunjaluk će mu doći ponizno. A čija najveća briga bude dunjaluk, Allah će mu dati siromaštvo u očima, učiniti će ga rastresenim i od dunjaluka mu neće doći osim ono što mu je propisano!" Uzvišeni kaže: "Ko je bolje vjere od onoga koji se iskreno preda Allahu, čineći još i dobra djela, i koji slijedi vjeru Ibrahimovu, vjeru pravu? A Ibrahima je Allah uzeo za prijatelja. Allahovo je ono što je na nebesima i ono što je na Zemlji; i Allah sve zna." (En-Nisa, 125–126)

O vjernici, neka niko od vas ne polaže svoje nade ni u koga drugog osim u Gospodara, i neka se ne plaši ničega drugog osim svojih grijeha. Čovjekov grijeh neće biti oprosteno sve dok ne popravi svoja djela, a neće popraviti svoja djela sve dok ne popravi svoje riječi, a neće popraviti svoje riječi sve dok ne bude svjestan svog Gospodara i ne bude Ga se istinski bojao. "O vjernici, bojte se Allaha i govorite samo istinu, On će vas za vaša dobra djela nagraditi i grijeha vam vaše oprostiti. A onaj ko se Allahu i Poslaniku Njegovu bude pokoravao – postići će ono što bude želio." (El-Ahzab, 70–71)

Allahov Poslanik, sallallahu alejhi ve sellem, rekao je: "Čovjekovo vjerovanje neće biti ispravno sve dok ne bude ispravno njegovo srce, a njegovo srce neće biti ispravno sve dok mu jezik ne bude ispravno govorio. U Džennet neće ući onaj od čijeg zla nisu mirne njegove komšije." Istinoljubivi i iskreni Poslanik obavijestio nas je da kada osvane sin Ademov, svi njegovi organi obrate se jeziku riječima: "Boj se Allaha po pitanju nas, jer mi smo onakvi kakav si ti. Ako budeš ispravno govorio, i mi ćemo biti ispravni, a ako ti zastraniš, i mi ćemo zastraniti." Uzvišeni kaže: "Onima koji govore: 'Gospodar naš je Allah' – pa poslije ostanu pri tome – dolaze meleki: 'Ne bojte se i ne žalostite se, i radujte se Džennetu koji vam je obećan. Mi smo zaštitnici





vaši u životu na ovome svijetu, a i na onome; u njemu ćete imati sve ono što duše vaše zažele, i što god zatražite – imat ćete, bit ćete počašćeni od Onoga Koji prašta i Koji je milostiv.’ A ko govori ljepše od onoga koji poziva Allahu, koji dobra djela čini i koji govori: ‘Ja sam doista musliman!’” (Fussilet, 30–33)

Znajte, o vjernici, da je najbolje što jezici mogu zgrabiti iz Allahovih posuda (ljudskih srca) salavat i selam na Allahovog Poslanika, sallallahu alejhi ve sellem, i to je jedan od najvrednijih, najljepših, najčišćih, najslađih i najpotpunijih oblika spominjanja Allaha, kojima se uljepšavaju srca i osvjetljavaju putevi.

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: “Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!” (El-Ahzab, 56)

Molim Allaha da i meni i vama podari blagoslov u časnom Kur’anu, i da podari da nam koriste njegovi ajeti i mudra opomena. Rekoh ovo i od Uzvišenog Allaha tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

